

Darganfod daioni Duw yn harddwch ein byd

Trwy ffydd yr ydym yn deall i'r bydysawd gael ei lunio gan air Duw yn y fath fodd nes bod yr hyn sy'n weledig wedi tarddu o'r hyn nad yw'n weladwy. Hebreaid 11: 3

Gweddi

Arglwydd Iesu, ein natur a'n tuedd yw troi pob harddwch yn "hagrwch cynnydd",
Gan lygru'r ddaear,
treisio'r hinsawdd a chreu blerwch ac anghytgord rhyngom a thi, rhyngom a'n gilydd, rhyngom a'n diben tragwyddol i'th fwynhau a'th ogoneddu.
Fel y cuddiaist y Ddraenen Wen gyda gorchudd o harddwch, cuddia lygredd ein calonnau, drain ein natur, a gorchfyga ni fel y medrwn fod yn dystion i'th harddwch a'th ogoniant.
Er mwyn Iesu Grist, Amen



Anogaeth

Peidiwch â chymryd eich camarwain; ni chaiff Duw mo'i watwar, oherwydd beth bynnag y mae rhywun yn ei hau, hynny hefyd y bydd yn ei fedi. Bydd y sawl sy'n hau i'w gnawd ei hun yn medi o'i gnawd lygreddigaeth, a'r sawl sy'n hau i'r Ysbryd yn medi o'r Ysbryd fywyd tragwyddol. Peidiwn â blino ar wneud daioni, oherwydd cawn fedi'r cynhaeaf yn ei amser, dim ond inni beidio â laesu dwylo. Felly, tra bydd amser gennym, gadewch inni wneud da i bawb, ac yn enwedig i'r rhai sydd o deulu'r ffydd.

Galatiaid 6.7-10

"Hyd yn oed pe gwyddwn y deuai'r byd i ben fory, byddwn yn plannu'r goeden afal heddiw." **Martin Luther**

Gweddi

Bydded i ogoniant a harddwch y gwanwyn
Sy'n ein hatgoffa o'n llawnder a'n llawenydd,
Sy'n dod â gobaith am haf a chynhaeaf, ddwyn egin heddwch, ffrwyth llawenydd, a chynhaeaf cyfiawnder i ni ac i bawb sy'n annwyl gennym.

Bydded i ogoniant Christ, yr Atgyfodiad yn y cnawd hedyd a gobath yr Atgyfodiad, egin y bywyd newydd yr hwn sy'n addewid, a chyflawnder y bywyd a geisiwn, ac a ddisgwyliwn ei feddiannu, trwy ras a ffydd, ein hamgylchynu heddiw.
Bydded i'w fywyd ffrwydro yn ein calonnau,
gorlifo i'n cynulleidfaoedd, gorchuddio'n gwlad a'n pobl gyda'i ddaioni.
Trwy Iesu Grist, Amen

Carol i ddathlu'r gwanwyn

Atolwg, lana' teulu,
Rhowch gennad inni ganu;
Mae'r yd a'r borfa'n glasu,
Yn tyfu ar y tir;
Mae'r gôg yn pyncio'i gore
Yn barod hwyr a bore,
Nid pell oddi wrth ein dryse
Yw dyddie C'lanme clir.

Pe medrem fod yn fodlon
A diolch i Dduw'n ffyddlon,
Efo sydd inni'n danfon
Bendithion digon da;
O'r fan lle bo bodlonrwydd
Yn wastad, a gonestrwydd,
Ni lithra fyth helaethrwydd
A hyfryd ffrwythydd ha'.

A gwyn eu byd eneidiau
Y rhai sy â'u holl galonnau
Yn labro ar union lwybrau
Daionus deddfau Duw;
Os medrwn fod yn fodlon
A diolch iddo'n ffyddlon,
Fe ddigwydd inni ddigon
O foddion yma i fyw.

Rhys Elis o'r Waun (1761)

Doethineb

"Y mae'n rhaid i ni wahaniaethu'n sylweddol rhwng Gair Duw a gair dynion. Sain heb sylwedd yw geiriau dyn, sy'n hedfan drwy'r awyr, a diflannu'n fuan. Y mae gair Duw yn fwy na'r nefoedd a'r ddaear, yn wir yn fwy na marwolaeth ac uffern ei hun am ei fod yn rhan o allu Duw, gallu sy'n para byth."

Martin Luther

Addewid

Dygwch y degwm llawn i'r trysordy, fel y bo bwyd yn fy nhŷ. Profwch fi yn hyn," medd ARGLWYDD y Lluoedd, "nes imi agor i chwi ffenestri'r nefoedd a thywallt arnoch fendith yn helaeth. Ceryddaf hefyd y locust, rhag iddo ddfifetha cynnyrch eich tir a gwneud eich gwinwydden yn ddfiffrwyth," medd ARGLWYDD y Lluoedd. "Yna bydd yr holl genhedloedd yn dweud, 'Gwyn eich byd', oherwydd byddwch yn wlad o hyfrydwch," medd ARGLWYDD y Lluoedd.

Malachi 3: 10-12